

**Maki Naña Pol Siria Pa Pan  
Li Nalelagaen Wa Lala Nae Garu  
EPISAS  
Visayuena Na Tusi Nene**

*Kompañasnen suniena plas na tusi nini*

Purp̄esnen sitomiena naña Pol pisayuia e m̄aki nini naña naga siria pan li nalelagaena lala garu Episas, nanini visena tai naña siria teke marana na keviu taaga na vetokaki lualima [1:10], naña pisayu na maplarena keviu kiena Ntewa. Pisape Ntewa sinenan sape suri la naña naga kila, yoko aimi aviranar la lele taaga. Naga sinenan sape suri nae mae peni a nae yomarava yoko asikolia ga amio Kristo, naña naga pe p̄arin suri makega. Pupia maplarena kiena Ntewa nene, naga miliganaria sape ve kiena yaru makega na yo punuga aimi aviranar la e p̄egas ve taaga ga e yomarava nini. Visae alelaga e Yesu Kristo, akilia akila sanene, a naga pisa ruru pa yeririna lala kiena Ntewa vena asiar naña akila meraravan maplarena nene e kiela maliena.

E kompañasnen m̄aki p̄esa nini, Pol pisayu mrapa naña Ntewa arimata miyumuñae ea vena kilaen yeririna makega aimi ave taaga. Naga pisayu p̄elaga naña Ntewa mligan lua kiena yaru lala, a pisayu naña e Yesu Kristo narina Ntewa, Ntewa piyewo la, a p̄ar plan kiela milamulena viowa ea, kila apimi amesmesu apo. A pisayu m̄ena naña Ntewa mila Ninuna Wa pan kiena yeririna

lala, vena kila meraravanen naña yoko naga la sur la van la, sanaña naga pisaar sape yoko kila. E kompasnen maki na lua, Pol pisa pan la naña yoko aulo maki nini, sape la monar akila meraravan naña ave taaga amio Kristo, e pelaga naña akilia asikol la ruru amio li nalelagaena tařena lala.

Pol pis pan la e pakaiwa lala, vena kila meraravanen pelaga naña yeririna kiena Ntewa lala asumã asikol ruru la ke amio Kristo. Naga pisape sumãre naga sane tas tai, naña Kristo naga pe parunia, pona sane yuãa tai, naña Kristo naga pe kemraře keyowo po na mrapun yuãa nena, pona sane sira tai naña Kristo naga pe wona.

Ntewa sinen sii manene yeririna na yomarava la pařisi, a yaru la apisu kilia sinesiena nene pim kome Kristo. Pupia sinesiena nene kiena Ntewa miyuri sitomiena kiena Pol, ana naga pisawal kiena lelagaena e Kristo e maki nini. Maki nini kila meraravan pelaga kiena Kristo naña sinen sii ita pařisi, mare vena ulplan ita, viyewo ita, sumã iila ita e kiena lemamiena, a kila ita temesmesu ruru nena ga e marana Ntewa.

*Kompasnen tusi la na nini*

Visena řesa 1:1-2

Kristo a kiena sumãre 1:3—3:21

Malena viu e Kristo 4:1—6:20

Visena maro 6:21-24

*Pol siar kiena visena pan la*

<sup>1</sup> Inu Pol, naña Ntewa ga naga mligan inu vena neve yaru nalologonen Lologena Wo kiena ne Kristo Yesu, inu nesiri lumñaki nini piñasu pan amiu, amiu li nalelagaena lala nae pupia pulku-mali naña Episas, naña amiu apiawa mñarera e Kristo Yesu.

<sup>2</sup> Inu nemlenwo amiu ke nesape pñisi na lemamiēna a suñarena kiena ne Ntewa Arimata a amio mēna ga kiena ne Yesu Kristo kieta Suñe, suña amio amiu.

*Ntewa naga visa ruru ita e Kristo*

<sup>3</sup> Popon naña ita teyeluar Ntewa, naña naga Ntewa kiena ne kieta Suñe, Yesu Kristo, a naga pe Arimana mēna ga, vanon naña ita, naña tepe taaga temio Kristo, ana Ntewa naga kila po pañisi pan ita e navisa ruruena wo lala nae ma metava. <sup>4</sup> Nanene naga sa naña pogos naña yomarava nini naga pere wa, ana Ntewa naga pisaar ita pñisi rui vena ita teve taaga temio Kristo, vena ita teve kiena, a vena kieta malena ikik ruru wo e marana, naña pe kororaki re e poli. <sup>5</sup> Nanua sumo laa rui, kome pupia kiena sitomena, ana Ntewa naga mliganar ita vena kuslua ita sane narina lala, kome Yesu Kristo. Suri nene, Ntewa naga kila sane mesmesun e ya naña naga piñu sape po, a naga kekaran mēna ga pañisi naña naga kila. <sup>6</sup> !Teyeluar Ntewa vanon kiena pupia lemamiēna nene a vanon mēna ga nalakorenanena wo nene naña naga mla korenan ga pan ita, naña pimi kome narina naña naga sitom pañisi!

<sup>7</sup> Tana ne narina nene mlau, ana vanon suri nena nene, ita naña tepe taaga temio Kristo nene, Ntewa naga pure plan ita, naña naga piewo kieta mlamulena viowa lala. !Lelaga pa, lemamiēna kiena ne Ntewa e ita keviu manene paṽisi, naga pa re laa na wa! <sup>8</sup> Ntewa naga pe manmarua paṽisi wa, a naga pisu kilale make suria, <sup>9</sup> ana naga kekaran naña tañan ita tekilia kiena sitomena tai naña naga sane navisawanena tai pan ita sumo. Naga kila sitomena nene pimi merarava ruru e ita narui, a kiena sitomena nene, nayumāenen suri wo la ve moki imi mālivi ga e Kristo. <sup>10</sup> E sitomena nene narui na, Ntewa naga sikol ruru suri punu ga va lele taaga, naña naga sii la sike ma e peni, a e mēna ga e yomarava nini, la aimi lele taaga vatanon Kristo, ana Ntewa naga yumāen ruru make suri punu ga torokin kiena sitomena nene, vano vano kilamake ruru ga e kana pog nena naapo.

<sup>11</sup> Ana ṽisi na suri punu ga monar imi mālivi mesmesun nena ga naña Ntewa naga sitom ruru ke pisape kila. Ana vena taveve kiena sitomena nene nanua sumo, naga pisaar imimi le Israel lala vena imimi meve kiena, naña imimi meve taaga memio Kristo. <sup>12</sup> Imimi ne nanini, Ntewa naga mliganar imimi vena imimi naña memligan ṽesan kiamimi sitomena mārera e Kristo, a visae sanene, popon imimi monar meieluar Ntewa silaga, komin naga po paṽisi.

<sup>13</sup> Ana amiū yeririna taṽena mēna ga lala, naña pe ape le Yu re la poli, amiū amloge visena

lelaga nene ĩisi rui, nanene Lologena Wo naĵa amiu atol kiamiu natamaliaena e naga, a amiu amlelaga e Kristo ĩisi rui, ana amiu apimi ape yeririna kiena ne Ntewa ĩisi rui. A vanon naĵa amiu na ape kiena, Ntewa naga mligan kana kile na suri nene tai e amiu, naĵa naga mla Ninuna Wa pan amiu, sa naĵa naga pisaaria. <sup>14</sup> A Ninuna Wa nene, naga sane komsus nen navisaarena na sumo kiena ne Ntewa e ita, vena ita tekilia ruru tesape metavan Ninuna nene, ĩisi na ita tokus lalimana punu ga ve kieta, nanene na e pogos naĵa Ntewa naga wereplan yeririna lala ava puna, nanene na la ga naĵa naga pul plan la ĩisi rui ana la ape kiena. !Ita teyeluar Ntewa, pe mias naga po paĵisi!

### *Leniena Kiena ne Pol*

<sup>15-16</sup> Komin suri ne la nanene, silaga e kiau leniena lala, nesuĵa nesitomaĵal amiu luen ga, a nepisa luen ga potena pan Ntewa vanon amiu. Pelaga nene, nesiar e pogos naĵa nemloge naĵa amiu apiawa ĵarera ke e Yesu, kieta Suĵe, a naĵa asitom manene ĵena ga nalelagaena wa taĵena lala, ana pimi tol nanagane, nesuĵa nemlen ke sanene. <sup>17</sup> Sila ga naĵa nesuĵa ga nemlen ke pa Ntewa, naĵa naga pe Ntewa kiena ne Yesu Kristo kieta Suĵe, a naĵa naga pe Arimata naĵa pe naurarena keviu, nesuĵa nepiun ke tania vena naga ligan Ninuna na manmaruaena naĵa Ninuna na kipuanena van amiu, vena akilia Ntewa va ve keviu laa sane.

<sup>18</sup> A nesuĵa nepiun ke tania vena naga vike kiamiu sitomena lala, vena avisu kilale kiena

yomerarava, vena akilia suri nene naña Ntewa naga pio amiu vanonia, a naña kiamiu sitomena monar m̄areraña vena atol suri nena. Suri la nene, naga lalimana la nene naña pe kiamiu, sa naña suri wo la moki naña Ntewa naga kila ruru sike na, naga pe kiena ne nalelagaena wa lala. <sup>19</sup> A amio m̄ena ga naga, monar avisu kilalea a monar akilia ruru pupia nam̄areraena kiena ne Ntewa, naña naga sum̄a miyum̄ae ke e kieta malena lala, naña ita temlelaga e naga. <sup>20</sup> Nanene naga nam̄areraena keviu ke ga nene naña Ntewa naga miyum̄ae ea e pogos naña naga pisirlua Kristo sum̄alu mali sina ga e mareña, ana naña siraunia, naga p̄ere naga pa mligan naga teke tano e kiena lepas marua ma e peni. <sup>21</sup> Nam̄areraena nene, naga pa laa metavan m̄areraena tañena lala, amio m̄ena ga suri m̄arera tañena lala, amio yerkawa tañena lala, amio nasumonena tañena lala nae ma e peni. Kia kiena ne Kristo naga mon manene laa metavan make kia tañena lala, pe e re ga e yomarava nini poli, ana e m̄ena ga e yomarava tañena nene naña yoko imi. <sup>22</sup> Ntewa naga mligan suri la punu ga asike vatano e lana ne Kristo rui, a naga mligan lua Kristo pa e kiena sum̄are wa, ana naga pe p̄arin suri la punu ga. <sup>23</sup> A kiena sum̄are wa nene, naga sane tasnena ne Kristo, naña naga pule ruru e Kristo, a naña Kristo ga rui naga pule ruru e suri punu ga e yo punu ga.

## 2

### *Nanagane ita temal e Kristo*

<sup>1</sup> Nanua sumo, ana sa ga naña amiu amare ga, vanon naviowaena lala, a kiamiu mlamulena viowa lala, <sup>2</sup> naña e pogos nene, amiu amial ga e p̄elaga viowa na yomarava nini. A nanua sumo, ataveve ga supe nene na nañareraena na yo yau lala, amlogear ga naga narui, naña naga ninuna nene naña naga suña kila ke kiena yuñaena e la naña pe amlogear re Ntewa poli. <sup>3</sup> Ana nanua sumo, imimi le Israel m̄ena ga lala, imimi na maran taaga ga memio yeririna tañaena lala, naña imimi mesuña memialoro metaveve ga nasinenanena na p̄elaga viowa kiena ne yeririna lala. Imimi m̄ena ga mesuña mekila ke ga suri la naña kiamimi sitomena la sinemiminia, a suri la naña imimi memloge po ea. Komin suri la nene, imimi na sa ga yeririna tañaena ga la nene, naña p̄isi na Ntewa naga sinena kar imimi m̄ena ga, tañatete kila si suri tai van imimi narui, vano vano p̄isi na naga monar la nakoena van imimi.

<sup>4</sup> Ana Ntewa, kiena sineyeena a kiena nasit-omiena naga keviu pañisi e ita, <sup>5</sup> ana pogos naña sane ita na temare p̄isi rui vanon kieta mlamulena viowa lala, ana naga kila ita temali temio Kristo. Nanene na lelaga, Ntewa naga tamalia ita kom ga e kiena lemamiena. <sup>6</sup> Ana sa naña ita na temali temio Kristo, Ntewa pisirlua ita temio m̄ena ga naga, ana Ntewa naga mligan ita teto tano temio m̄ena ga naga e yo nametava.

<sup>7</sup> Ntewa naga kila sanene vena e pogos la naña apimi ke ne, p̃isi na yeririna lala, la akilia avisu kilale sane kiena lemamiēna nene naga keviu manene pañisi, naña naga sitom ita sanene kome Kristo Yesu. <sup>8</sup> Ntewa naga tamalia amiu e ga e kiena lemamiēna, vanon naña apiawa e naga. Suri nene naga pe pimi m̃alivi re e kiamiu yuñāena wo lañas poli, peraga, Ntewa naga mla korenan ga pan amiu. <sup>9</sup> Ana nanene naga pe suri re tai naña yaru kilia yuñae vanon poli, komin visae ve sanene, p̃isi na towarwar itan vañisi, tevis vilavenia, tevisave “O inu, in ga netamalia in e kiau yuñāena.” <sup>10</sup> Ita na sane suri wo tai naña Ntewa miyumuñāen ruru po pañisi, naña naga sii ita tepimi tepe yaru viu lala e Kristo Yesu, a Ntewa naga kila sanene vena ita tekila m̃ena ga yuñāena wo lala, naña naga mligan ruru sumo rui, vena ita teyumuñāenia e kieta malena lala.

### *Ita na teve taaga e Kristo*

<sup>11</sup> Amiu na monar asitom̃ali pogos naña apaeme, ana amiu na pe ape yeririna kiena ne Ntewa re poli sane le Yu lala, amiu na ape yaru tañena ga lala. Komin suri ne nanene, le Yu lala, la asitom ke asape la ape yaru wa, komin naña la apuarar manene p̃aviu m̃arera, ana la apisa kare amiu apisa “Kulpaona” pan amiu. Ana p̃aviu nene naga pe suri korena ga na vanua ga e tas nen yerm̃ene ne. <sup>12</sup> Ana komin nanua sumo, amiu na sa ke nene narui. Amiu ve sinemiu p̃esan re naña nanua sumo, amiu asike laa koperinan Kristo pañisi, amiu na asike vanuan p̃egas nen le Israel lala, amiu na ape



wolawa ga, naña amiu na tařatete akilia atol suri la naña Ntewa naga pisaar pan kiena yeririna lala. Ana amiu naña asike e yomarava nini, amiu na peraga ape suri korena ga narui, a amiu na pe akilia re nena Ntewa poli. <sup>13</sup> Ana amiu, naña nanua sumo asike laa perina, nanagane amiu apimi lavisi rui komin tana ne Kristo, nanagane narui amiu na ape taaga amio naga.

<sup>14</sup> Kristo naga pe kieta suñarena, ana naga kila kieta ãegas lua nene apimi ape taaga. Nanua sumo, imimi le Yu lala memio amiu yeririna tařena lala, naña ita sineta kar ita ñaga silaga, sa ga naña pupia kove tai mliřere ita, ana Kristo naga ñe plan suri nene e kiena marena. <sup>15</sup> Naga pisaluřar navisaluaena kiena ne le Yu lala, amio kana narin visena ne lala, a naga kila sanene naña kila kieta ãegas lua nene lalua aimi ave yaru taaga e naga, sane lalua aimi ave suri viu tai. Visae ve sanene narui, Kristo naga kila suñarena van ita. <sup>16</sup> E kiena marena e laki torovia, naga kilalua sinemimiena e ita, naga kila kieta ãegas lua nene apimi ape yeririna taaga, ana naga pure ita sina ga tořasuře si puna ne Ntewa, naga kila ita tepe mara wo temio naga. <sup>17</sup> Pogaga, e ãelaga nene narui, Kristo naga pimi, pisawal lologena wo na suñarena nene pa yeririna la punu ga, nanene na amiu naña pe ape le Yu re poli, naña amiu asike laa perinan Ntewa, amio imimi ñena ga le Yu lala naña imimi na mesike lavisin řisi rui. <sup>18</sup> Ana komin suri ne la nanene naña Kristo naga kila rui, nanagane ita

punu ga kieta mrapa taaga e Ninuna taaga, naña teimi e marana ne Arimata.

<sup>19</sup> Ve sanene, ana amiu na pe ape wolawa la re si poli narui, a amiu na pe ape yaru re si naña pe kiela yo re poli, peraga. Nanagane, amiu na sa ga yeririna na yo kiena ne Ntewa, amio li nalelagaena wa tañena lala, a amiu asike loyuma e mana mratava. <sup>20</sup> Amiu na sane kemrañe lala na yuma tai, naña li nalologena lala amio li navisawalena lala, la sane kemrañe na mrapun yuma lala. E yuma nene, Yesu Kristo naga sane kemrañe wo naña pe keyowo meke lika, <sup>21</sup> naña naga suma puarar ruru ke kemrañe tañena la nene. Naga puar la, ana la asumalu marera, ana yuma nene naga sa naña suma pimi pe yuma wa mana ne Ntewa. <sup>22</sup> Ntewa naga miyumaen amiu ke sanene narui, vena e Kristo amiu li nalelagaena lelaga lala, amiu asma apimi ke sane yuma tai, naña naga kilia va sulueen ga loyuma ea e Ninuna.

### 3

#### *Pol kila yumaena kiena ne Suñe pan la rui*

<sup>1</sup> Ana komin suri la nene naña nepisa pisi rui, inu Pol, nemlen wo amiu pa Ntewa. Nanagane nesike e yuma na koena, vanon naña nemiyumaen ke yumaena kiena ne Kristo Yesu pan la naña pe ape le Yu re poli, sane amiu, a in na nemlen wo amiu ke na wa pa Ntewa. <sup>2</sup> ?Pona amiu na apisu kilale maga naña sane nesuma nemiyumaen ke vanon amiu sanene, pona peraga? Kiau yumaena naiila amiuena nene, Ntewa naga

mla pan inu e kiena lemamiēna, <sup>3</sup> ana naga sane kiena sitomena tai naḡa sumo naga mlawania, ana siraunia naga kipian inu ea.

Ana suri nene nesiriyu ḡisi rui, <sup>4</sup> a visae amiu auloia, ḡisi na amiu atol kiau kiliaena e lepas nen sitomena nene kiena ne Ntewa, naḡa nanagane sumā pimi ke merarava e Kristo. <sup>5</sup> E teras nasumo lala, yeririna lala la pe akilia re suri nene poli sane nanagane, naḡa nanagane Ntewa kipian ke e li nalologena wa lala amio mēna ga kiena navisawalena lala kome Ninuna Wa. <sup>6</sup> A visena nene naḡa naga pimi merarava, naga sanene narui, naḡa pisa sanini pisape, yeririna taḡena mēna lala, la amio le Yu lala, la ga luwoka ga la atol navisa ruruena lala kiena ne Ntewa, a naḡa la sa ga ape lepas nen tasnela taaga ga, a naḡa navisaarena kiena ne Ntewa lala, la ga luwoka kiela. Suri wo la nene la apimi aḡalivi komin lologena wo kiena ne Kristo Yesu.

<sup>7</sup> Ana Ntewa naga kila inu nepe yaru na yuḡaena kiena ne lologena wo nene tai narui, ana yuḡaena nene naga pe nalaena wo tai naḡa Ntewa naga mla pan inu, naḡa kiena naḡareraena sumā miyuḡae ke kome inu. <sup>8</sup> Inu neto manene laa tanon nalelagaena wa taḡena lala, ana nekekara paḡisi naḡa e lemamiēna kiena ne Ntewa, naga mligan e luḡau vena nelologon kiena lologena wo van la naḡa la pe ape le Yu re poli. Ve sanene narui, nesumā nepisawal ke pan la e suri wo kiena ne Kristo lala, naḡa aulo ḡele ga, <sup>9</sup> a nekipian la ke mēna

ga sanape naña Ntewa naga sumña kila ke kiena sitomena nene pimi þarpoyo. Siar e pogos naña Ntewa naga sii suri punu ga, pimi tol pogos la naña aþaro pa þisi rui, Ntewa naga mlawan kiena sitomena nene toña ga, <sup>10</sup> ana e kieta pogos nini narui, naga kila navisi lala amio namareraena lala e yo na metava ma e peni, la avisu kilale kiena namanmaruaena taþena lala, e suri la naña naga miyumaenia e lotuena kiena ne Kristo. <sup>11</sup> Suri la nene na, la torokin sitomena kiena ne Ntewa, naña naga sitom ruru kemua sumo rui, pogos naña yomarava nini na pere wa, ana naga kila suri la nene la apimi amalivi rui kome Kristo Yesu, kieta Suþe. <sup>12</sup> Ana komin naña ita tepiawa e Kristo, a komin naña ita tepe taaga temio naga, ana ita tekilia teimi tesumalu e marana ne Ntewa narui, naña kieta sitomena ve yuwawa re, a monar sineta marera e naga tevisave þisi na naga kekaran ita. <sup>13</sup> Komin suri ne nanene, nepiun mareran pan amiu, nepisape, awis, amiu na ve ataman re sinemiu la aloru pogos tai, naña ve aloge manene re viowagan inu e pog marera la nene naña nekus ke vanon amiu e yumã nakoena nene, naña la akilali inu ke paþisi. Suri la nene na, la vena illaar amiuenta vena atol naurarena kiena ne Ntewa.

### *Leniena kiena ne Pol*

<sup>14</sup> Sanene, komin suri ne la nane nepisa ke ne, nekinai, nemlen wo amiu pa Arimata, <sup>15</sup> naña naga pe Arimata kemua lelaga, naña ata taþena lala na mratava lala nae ma e peni amio mena

ga nae yomerava nini, la asuũa amla ke ðelaga wo a kiela kia wo lala, e ga e naga.

<sup>16</sup> Nesuũa nepiun ke tan Ntewa, nesape sa naða naga kiena naurarena keviu paðisi, ðisi na ligan kiena nañareraena e losinemiu kome kiena Ninuna, vena sinemiu lala asuũalu mñarera asulue. <sup>17</sup> Inu nesuũa nemlen ke mnea ga, nesape Kristo naga suũa pumi silaga e losinemiu lala kome kiamiu naviawaena, a nemlen wo amiu mnea ga vena ðelaga nasitomiena imi sane purðes nen kiamiu malena lala. <sup>18</sup> Visae ve sanene, ðisi na amiu, amio nalelagaena wa taðena lala, akilia u atorokin naða avisu kilale pupia nasitomiena kiena ne Kristo, sanape naða pe lepalepasa, pona piavi, pona pa metava, pona merorol sanape. <sup>19</sup> Lelaga ða, kiena nasitomiena nene naga keviu manene paðisi, ita taðatete tevisave tekilia ruru rui. Ana pe suri korena ga, nemlen ga vena ðisi na amiu na akilia avisu kiena nasitomiena nene e kiamiu malena lala, vano vano-o ðelaga wo kiena ne Ntewa lala, a kiena malena wo, aule ruru e amiu.

<sup>20</sup> Ana nanagane, teyeluar Ntewa, naða e kiena nañareraena keviu naða naga suũa miyuũae ke ea e losineta lala, naga kilia yuũaenia taulu manene ya naða tekilia teviun tania, pona ya naða tekilia tesitomia. <sup>21</sup> Ana nanagane, nalotena kiena ne Ntewa wetelu miyeluar naga komin Kristo Yesu, nanagane, a e mnea ga e teras lelein lala na pogos la naða apimi ke ne, vano vano-o ve uro re, sanene.

*Ita na sane tepe tasneta taaga e Kristo*

<sup>1</sup> Sa naña nesike e yuñña naloge viowaena, komin yuññaena kiena ne kieta Suñe, neñareran amiu, nesape kiamiu malena lala monar mesmesu ruru e ñelaga nene naña Ntewa naga pio amiu vena amiu ayal ea. <sup>2</sup> Ve sanene, amiu avatanon amiu, a amoñau silaga. A kiamiu sitomena lala monar malum ga van amiu, naña ve sinemiu mimi koskos re van amiu. Pelaga na nasitomienna ne nanene. <sup>3</sup> Amiu na akilayonli naña auarar ruru sumãare nene naña naga sumãa sikol ruru amiu, ana ve sanene, akilia avisuar ruru navetaagaena naña Ninuna Wa naga sumãa mla ke pan amiu. <sup>4</sup> Amiu na sa ga ape tasnemiu taaga ga, a Ninuna mña ga taaga ga sike e amiu, a e ke e ñelaga nene ana navisaarena taaga ga, naña kiamiu sitomena kilia sumãalu mñarera se ea, naña Ntewa naga pio amiu vanonia. <sup>5</sup> Ana Suñe Yesu naga taaga ga, a kieta nalelagaena taaga ga, a nakeena mña ga taaga ga, <sup>6</sup> a Ntewa mña ga taaga ga naña sike na, naña naga pe Arimanane yaru punu ga, a naga pe suñen suri punu ga, a naga miyumãen kiena yuññaena ñarpoyo e yo punu ga, a naña naga sike e malena kiena ne yeririna punu ga.

<sup>7</sup> Ana e ita punu ga peve taaga, Kristo naga mla nalaena tañena lala e kieta malena lala, naña la apowo pañisi, mesmesu e kiena pupia lemamienna. <sup>8</sup> Nanene na sa naña Visena Wa naga pisa nanua sumo rui e Yauena Lala, naña pisa pisape

*“Pogos naña naga pa metava e yo na metava manenea,  
naga ãere kiena nasinekar lala naña naga  
taulu la rui, ataveve naga,  
a naga mla nalaena pan kiena yeririna lala.”*  
*Yauena 68:18*

<sup>9</sup> ? Ana visena naña pisa pisape “Naga pa metava,” naga kana kinasia na ya? Kinas nen visena nene sape nanua sumo, naga pito manene laa tano rui, naña naga pitomi tano e yomarava nini, naga pito tano e kana ãiliãili merorol ne lala. <sup>10</sup> A yeririna nene, naña sumo naga pitomi tano, naga pe yaru ña ke sina ga nene naña sirau naga pa laa metava, metava ma e peni, ana ãisi na, naga pa ke laa metava na wa, vena naga kilia kokonia yo la punu ga naña Ntewa sii la. <sup>11</sup> A naga yaru ke ga naña naga mla nalaena pa kiena yeririna la narui, naña laãasia, naga mligan la ape li nalologena lala, laãasia, naga mligan la ape navisawalena lala, laãasia, naga mligan la ape nayalinen Lologena Wo, a laãasia, naga mligan la ape yaru na visuaren li nalelagaena lala, ana laãasia, la ave navian laena ñena ga lala. <sup>12</sup> Kristo naga kila sanene vena kiena li nalelagaena wa lala akilia akila kiena yumãena, vena ãegas kiena ne li nalelagaena lala e yomarava nini, naña sane tasnena, kilia kapuru manenea, a imi ñarera laa sane. <sup>13</sup> Ve sanene, ãisi na ita punu ga tekilia teimi teve taaga ga e kieta naviawaena e Narina ne Ntewa, a ita teimi teve taaga ñena ga naña tevisu kilale ruru naga e kieta malena lala. Naga ke nanene narui, tekilia teimi teve sa naña yaru na marua,

vano vano tol naŭa temarua ruru sane Kristo, naŭa ŝisi ita teimi teve yerkawa kemua lelaga sane naga.

<sup>14</sup> Sanene, ŝisi na ita ve teve sa re si sisi, naŭa navianena taŝena kiena ne yaru na visokanena lala aure kieta sitomena lala va ve taŝena, a naŭa kiela navisa kotalia itaena lala la apilovilon ita, sa ga naŭa lagi miyu ita, pona sive suŝa kuakuankare ita tepa sane, tepa sane, peraga.

<sup>15</sup> Ana monar towarar nalelagaena e ŝelaga nasitomiena, a e kieta mrapa la punu ga, monar tekapuru vena teimi teve yerkawa lala e Kristo, naŭa naga pe ŝarin ŝegas nen kiena nalelagaena lala. <sup>16</sup> A ita na sane kinakinas nen tasnena lala, a naga suŝa kila ke kinakinas la nene apimi ape tas taaga ga e naga, naŭa kiena merpu lala la asuŝa asikol ruru kana kinakinas la nene van ŝarina. A pogos naŭa kana kinakinas nen tasnena la nene, la ataveve ruru kiela yuŝaena lala, a la asuŝa asitomila, ana tasnena nene naga kilia kapuru, kilia imi m̃arera va laa sane.

### *Malena viu e Kristo*

<sup>17</sup> E kia kiena ne kieta Suŝe, nom̃areran amiu ke sina ga, nesape amiu na monar avisuar amiu, ŝisi na amiu na ve ataveve re si ŝelaga kiena ne la naŭa pe amlelaga re e Ntewa poli. La nene, kiela sitomena lala apiowa rui, ape mias pa rui, <sup>18</sup> ana asike ga e yemalolo. Ana la asike manene laa perinan malena nene naŭa Ntewa naga mligan ke pimi, komin naŭa la ŝarila m̃arera paŝisi sa ga kilavaru, la pe amloge kilia



re suri poli. <sup>19</sup> Sinela lala tařatete si amawan kiela naviowaena lala, ana la atařan la ga e lau narui, a e řelaga na kororaki lala, nařa la asitom korenan ga.

<sup>20</sup> Ana e Kristo, pe apian amiu re nenaga e řelaga tai ne sanene poli, peraga. <sup>21</sup> Ana la apisayu kiena suri wo la moki pan amiu řisi rui, pan amiu nařa ataveve ke naga, a la apian ruru amiu e nalelagaena la nene nařa sike e Yesu. <sup>22</sup> Sanene, ana amiu na monar aligan lua řelaga marua nařa apaeme amio. Pelaga nene naga sumã kila ke kiamiu malena na sumo pimi piowa, a sumo, kiamiu nasinenanena viowa na řelaga la nene asumã apisa kotalia amiu, ana asumã akila kare manene kiamiu malena la keviu pařisi. <sup>23</sup> Ana nanagane, sinemiu lala a kiamiu sitomena lala monar imi ve urviu nenaga, <sup>24</sup> a amiu na monar akus řelaga viu lala na kiamiu malena viu e Yesu nene, nařa Ntewa naga sii e amiu, sa ga kiena, nařa yeririna lala la akilia avisu sa nařa mesmesu ruru kemua, a pe suri wa.

<sup>25</sup> !Sanene narui, visokanena toko! Komin nařa ita tepe kinakinas nen tasnena ne Kristo ga, ana monar teve lelaga lue ga va nalavisin ita la silaga.

<sup>26</sup> A visae sinemiu mimi pogos tai, ve akila re nařa nasinemimiena nene were amiu ava e namlamulen viowa, a kiamiu nasinemimiena nene monar vito tano sumo, řisi na mrae vito tano. <sup>27</sup> Amiu na monar ve ala re pulmas tai

va Yermare, vena naga imi kila kare amiu, ava aviowa laa sane.

<sup>28</sup> Yaru naþa sumo naga pe yaru na vinauena, naga monar þisin vinauena. Naga monar yuñae ñarera e limana, e þelaga na mesmesu, ana þisi na naga kilia visuar ruru naga, a iila ñena ga yaru la naþa limala korena.

<sup>29</sup> E kiamiu visena lala, ve avisa re visena kar lala, ana avisa ga visena la naþa naga kilia iilar kiela sitomena lala, naþa la aloge kiamiu visena nene, naþa naga toroki ga, a naþa mesmesu, a naþa kilia iila la. <sup>30</sup> Amiu ve akila re Ninuna Wa memawa, pona loge viowa vanon kiamiu visena viowa la nene, komin naþa Ninuna Wa nene, Ntewa naga mligan e amiu sane kiena kile tai, vena naga visawal visave amiu na ape kiena, a vena visawal ñena ga visave þisi na naga wereplan amiu e legiena maro. <sup>31</sup> Sanene, popon ve akila re si sinekarena lala, a sinemiu ve uarar re si simimiena, a sinemiu ve melkalka re sina. Amiu aligan þelaga na vilupena a navisviowaena, a aligan þelaga na sinekarena.

<sup>32</sup> Ana amiu na awo van amiu, a sinemiu lala malumu ga van amiu, aviewo amiu, sa naþa Ntewa naga piewo amiu rui kome Kristo.

## 5

### *Amiu na ayal e yomerarava*

<sup>1</sup> Ana komin naþa amiu ape sisi wo kiena ne Ntewa lala, amiu akilali naþa ataveve kiena þelaga. <sup>2</sup> Amiu na monar ayal e nasitomiena, sa

naña Kristo naga sitom amiu, naga tamñan kiena malena pan amiu, sane ponotaninu tai naña po pan Ntewa, a sane nakupañaena tai naña Ntewa kekarania.

<sup>3</sup> Komin naña amiu ape nalelagaena wa kiena ne Ntewa, ana pe mesmesun re nenaga naña pogos tai, suri lañasia imi kakate e amiu sane lau, pona suri na memawaena lala, pona ðelaga nasinesuniena suri lala, a suri la nene pe pon re mñena ga ava atakorkoron poli. <sup>4</sup> A pe pon re naña amiu avisa visena kar la poli, a visena namname lala, a visena na totorouena viowa. Ana popon amiu na asumña avisa ga potena van Ntewa. <sup>5</sup> Nesape nevisa meraravan van amiu sanini: la naña la asumña ataña ke lau, a la naña asumña akila ke suri na memawaena, a la naña sinela sun manene suri la silaga, la nene ðisi na akokovio. Yaru na sinenan manene laa suri la silaga, naga maran taaga ga amio yaru naña naga mlotun ke suþe taþena lala. Amiu na monar alelaga e visena nini silaga, pisape la naña apuarar ke ðelaga viowa la nene, ðisi na la taþatete nenaga akilia ava loyumña e Nasuþenena kiena ne Kristo amio Ntewa.

<sup>6</sup> Amiu na ve atamñan re yaru la aure amiu ava e mrapa taþena lala, naña la avisa kotalia amiu ga e kiela visena kiki lala. Suri ne la nanene naga kila Ntewa naga sinena karla rui, sa naña visae la pe amlogear re naga poli, ana ðisi na naga la nakoena van la. <sup>7</sup> Pisi na amiu ve ava ave þegas re nena amio yeririna la ne sanene. <sup>8</sup> Nanua sumo na, amiu la nene ape yeririna na yemalolo ga lala, ana nanagane naña

amiu asike e kieta Ntewa narui, ana amiu asike m̃ena ga e kiena yomerarava. Ve sanene na, amiu monar ayal silaga ve sa naṓa amiu na ape yeririna na yomerarava nene narui, <sup>9</sup> komin e yomerarava nene, ṓisi na kiamiu malena wo, a mesmesu, a ve lelaga, ana ṓisi na kilia war mras la naṓa po ve moki. <sup>10</sup> Amiu na monar akilayonli naṓa alual ṓelaga ya naṓa kieta Ntewa naga kekarania. <sup>11</sup> Pisi na amiu na ve amio re yeririna la naṓa la akila ke suri viowa lala, naṓa pe yuṓaena korena ga lala na yemalolo. Ana popon visae amiu avietavan suri viowa la nene aimi e yomerarava. <sup>12</sup> Ita na tememawanli m̃ena ga vena tevisayu suri la naṓa la apa akilawania, <sup>13</sup> ana pogos naṓa Ntewa naga vietavan suri la punu ga nene, aimi e yomerarava, ṓisi na yomerarava nene naga kila ṓelaga la nene la amolmolue. <sup>14</sup> A pogos naṓa yomerarava naga kila suri la punu ga imi molmolue e yometava sanene, suri m̃ena ga la nene ṓisi na imi ve sa yomerarava. Nanene na sa ga yauena nene pisa, naṓa naga pisa, pisape

“Ko nene naṓa omomalio rui, otavilo, osuṓalu e marena, omal sina, ana ṓisi na Kristo naga tegoli ko.”

<sup>15</sup> Komin suri nene, amiu na monar avisuar ruru amiu, sane ṓisi na yoko ayal ve sanape. Pisi na amiu na ve ave sa re la naṓa la pe ṓarila re poli, ana amiu na monar akila ṓelaga kiena ne yeririna la naṓa ape manmarua ruru po. <sup>16</sup> Amiu na monar ava ayuporu e pulmas punu ga

naþa amiu ańalia, vena kilaen yuńaena wo lala ea, komin naþa ita tesike e pogos na viowaena. <sup>17</sup> Pisi na amiu ve ayuńae wowe re, ana monar amiu na akilali akilia suri punu ga la naþa kieta Suþe naga sinenan sape akila.

<sup>18</sup> Pisi na amiu na monar ve amun re si kuruta na munena vano vano-o akilalu þarimiu, vanon þelaga nene, þisi na naga kilia kila kare make ke sina ga kiamiu malena lala. Ana amiu na monar aule ga e Ninuna Wa. <sup>19</sup> Popon naþa amiu asunyu visena na Tus na Yauena lala, a yauena wa lala, a yauena na yeluarena Ntewa lala van amiu, a amiu monar ayau e yauena wa lala, vena aieluar kieta Suþe e sinemiu la wetelu. <sup>20</sup> A vanon suri la punu ga, silaga amiu asuńa avisa potena va Arimata Ntewa, e kia kiena kieta Suþe, Yesu Kristo.

### *Pelaga na talopaena*

<sup>21</sup> Amiu li nalelagaena lala, yermene a sira, monar avatanon amiu, sa ke ga naþa asuńa apatanon ke Kristo.

<sup>22</sup> Amiu sira la naþa atalopa, monar avatanon womiu lala, sa naþa asuńa apatano ke pa kieta Suþe, <sup>23</sup> komin naþa yermene naga pe þarin wona, naga sa naþa Kristo naga pe þarin kiena lotuena, naþa lotuena nene naga pe tasnena, naþa naga tamalia. <sup>24</sup> Komin suri nene, sira lala la monar avatanon wola lala e suri punu ga, sa ke naþa lotuena kiena ne Kristo suńa patanon ke naga.

25 A amiu yerm̃ene la naḡa atalopa, monar asitom manene womiu lala, sa naḡa Kristo naga sitom manene kiena lotuena, ana naga taḡan kiena malena vanonia. 26 Naga kila kiena lotuena mekiki, a naga kevania e wii, a e kiena visena, ana naga miawa pa Ntewa. 27 Kristo naga kila sanene vena kilia were kiena lotuena imi puna, naḡa naga pe wa naḡa pe wa ruru manene laa sike na, sane sira m̃ee tai, naḡa naga sum̃ate ke sape talopa, naḡa naga mekik ruru po, a naga pe namname re poli, a sa naḡa amiyowau ruru tanea naga po na po. 28 E ḡelaga m̃ena nene, yerm̃ene naga monar sitom manene wona, visuar ruruia sa ga naḡa naga pisuar ruru ke ga tasnena. Yerm̃ene naḡa naga sitom manene wona, naga sum̃a sitom ke sina ga naga. 29 Yaru la ve asum̃a avisu kare re tasnela lala, pona akila kare la, peraga, ana yeririna la asum̃a apagan rurula, a la asum̃a apisuar ruru ke tasnela lala. Naga nene naga sa ke ga naḡa Kristo kila ke pan kiena lotuena, 30 a ita na tekilia ruru suri nene po paḡisi, komin naḡa ita na tepe kinakinas nen tasnena lala. 31 Visena Wa naga pisayu m̃ena ga ḡisi rui, naḡa yerm̃ene amio wona, lalua na aimi ave tasnela ve taaga ga, naḡa naga pisa pisape “Komin suri ne nanene, yerm̃ene ligan arimana amio anena, vano vilolar wona na sira, ana lalua aimi sane ave taaga ga narui.”

32 Visena Wa nene, visena urmi tai naga sum̃a ea, naḡa sumo naga sane navisawanena ga tai, ana nanagane, nekilia nesape visena nene naga

suña pisawal ke Kristo amio kiena lotuena ne.  
<sup>33</sup> Ana ve asitom re avisave visena nene naga pe pisa amiu re m̃ena poli, peraga, pisa amiu ke m̃ena ne. Ee lelaga p̃a, amiu yerm̃ene lala, monar asitom manene womiu lala, sa ga naṗa asitom amiu ke ga, a amiu sira m̃ena ga lala, monar avatanon womiu lala.

## 6

*Pelaga kiena ne sisi lala amio arimala lala a anela lala*

<sup>1</sup> Sisi lala, amiu na ape sa naṗa li nataveveena Kristo, amiu alogear arimamiu lala a anemi lala, sur ne nanene na mesmesun naṗa amiu akila. <sup>2</sup> Navisaluaena tai e Visena Wa kiena ne Ntewa pisa sanini, naṗa pisape “Amiu na ato ga tano e arimamiu amio anemi lala,” a naga nene navisaluaena na sumo naṗa kiena navisaarena tai teke metava e a, <sup>3</sup> naṗa naga pisa, pisape visae akila sanene,

*“ṗisi na sur na kiamiu malena lala kilia kiriri wo,  
 a vena ṗisi na kiamiu malena e porotano  
 nini naga ve piavi.”* *Naw 5:16*

<sup>4</sup> Amiu arimala lala a anela lala, sinemi la ve vilul re va narimiu lala silaga, vano vano la sinela kar amiu ke sina ga. Ana amiu na monar akawe ruru la mesmesu, a amiu avian la, a akipian la e mrapa na kieta nalelagaena e Kristo.

*Pelaga kiena ne yaru na yum̃aena amio kiela yerkawa lala*

<sup>5</sup> Amiu yaru na yuũaena lala, alogear kiamiu yerkawa lala na yomarava nini, sa naũa ama-raun la, a avatanon la, a amiu monar akila sanene e sinemiu la wetelu, sa naũa amiyuũae ke kiena ne Kristo. <sup>6</sup> Amiu na pe pon re asuũa akila ve sanene e pogos ga naũa la asike amio amiu poli, vena amiu akilali ga naũa la akekaran amiu, ana monar akila suri la naũa Ntewa naga sinenania silaga, amio kemua sinemiu lelaga, sa naũa amiu na ape yaru na yuũaena kiena ne Kristo. <sup>7</sup> Amiu na monar akekaran kiamiu yuũaena lala, a popon ve akila re si yuũaena sa ke naũa amiyuũae ke ga pa yaru, ana akila sa naũa amiyuũae ke pa kieta Suũa. <sup>8</sup> Amiu na asitomli sa naũa visae yaru tai naga pe yerkawa tai, pona naga pe yaru na yuũaena ga tai, ana pe suri korena ga, ỹisi na Suũa naga lamaran suri wo vania torokin kiena yuũaena wo lala.

<sup>9</sup> A amiu yerkawa kiena ne yeririna na yuũaena lala, amiu mũena ga akila mesmesu va kiamiu yeririna na yuũaena lala, a ve avisin re sinekar van la silaga. Amiu na asitomũalia, naũa amiu amio la, amiu punu ga kiamiu Yerkaawa taaga ga naũa sike ma e peni, a naga suũa kila maran taaga ga pa yeririna la punu ga.

### *Tekila mara pa yermare*

<sup>10</sup> Lavisi ke nekila make kiau visena narui, ana nesitom nesape nevisa van amiu sanini, amiu aũareran manene li naũa amiu aũarera e kieta Suũa, amio kiena pupia naũareraena. <sup>11</sup> Amiu na ayen kulsota mũarera na mara lala



naþa Ntewa naga mla pan amiu, vena amiu akilia asumãalu, a akilia asuwo mraai kiena ne Yermare, amio kiena navisokanen viowa lala naþa naga sumãa kila ke pan amiu. <sup>12</sup> La naþa ita tesuãa tekila ke mara pan la e kieta malena, la pe ape yeririna re poli. Ita tesuãa tekila ke mara pa namãreraena taþena la ne, amio yerkawa lala kiena ne yermare lala, amio suþe lala kiena ne la naþa nanagane la ape purþes nen yemalolo e yomarava nini, a tesuãa tekila ke mnea mara temio kimi viowa la nene, naþa la moki liu, naþa asumãa ke e yo punu ga.

<sup>13</sup> Ana popon ayen ruru suri na kilaen mara kiena ne Ntewa la nene narui, ana pogos punu ga a e legiena punu ga, naþa Yermare naga imi vena kila mara van ita, þisi na ita tekilia tekila mara va nasinekar la nene, vano vano þisi, ana ita tesuãalu mãrera ke tesike na wa.

<sup>14</sup> Pogos naþa amiu asumãalun kilaen mara sanene, kiamiu sur mãrera nakilaen mara lala na sanini narui. Kulka naþa aþereari e mneþemiu, naga sa naþa amiu apuarar þelaga na lelagaena. A kulsota mãrera na kilawoen yepemiu vanon mraai lala, nanene na sa naþa amiu apuarar ruru þelaga mesmesu sumãa e kiamiu malena lala wetelu. <sup>15</sup> Ana pupia kulus nen lamiu na yalena, naga na sa naþa amiu asun ke asape ava avisawal Nalologena Wo na sumãarena. <sup>16</sup> Kulþave nene naþa amiu na apuararia nakilawoen mraai kiena ne Yermare la nene, naþa kapi pivavaga ke e la, nanene naga sane kiamiu naviawaen mãrera e Ntewa. <sup>17</sup> A kiamiu kulparimiu na mara, naga sane natamaliaena, naþa Ntewa naga

mła pan amiu, a playu na kilaen mara kiena ne Ninuna Wa naþa amiu awaria, naga sane Visena Wa kiena ne Ntewa.

<sup>18</sup> A amio suri la nene, amiu na monar alen mēna ga, monar aviun tan Ntewa vena iila amiu. A silaga monar alen e nañareraena kiena ne Ninuna Wa, a þisi na monar asitoñal li nalelagaena wa taþena la silaga e kiamiu leniena lala, naþa maramiu ve kawa re pogos tai. <sup>19</sup> A naga ke sina ga, amiu na monar alenwo inu mēna ga, vena þisi na Ntewa naga la pulmas na visena tai van inu vena nevis, vena ve nesitom þele re naþa nekilia nelologon Nalologena Wo kiena ne Křisto, naþa sumo naga su tapoloun yeririna lala, ana nanagane, þisi na neñareran naþa nevisawal van la. <sup>20</sup> Inu na nepe yaru na lologonen Nalologena Wo nene, ana nesike e yuñā nakoena, ana amiu na monar alenwo inu vena ve nesitom þele re naþa nelologon Nalologena Wo nene e nini, sa naþa mesmesun ga naþa netaþa.

### *Visena maro kiena ne Pol*

<sup>21</sup> Inu sineun nesape vena amiu na akilia kiau suniena lala, ana komin sur ne nanene yoko neligan kieta erau wo nene, Tikikas, iñasu pun amiu. Naga na þar yepe mēan yuñāena lala kiena ne kieta Suþe e yo nini, <sup>22</sup> ana þisi na naga visawal van amiu visave imimi mesike sanape, vena amiu na akilia aloge wo si e imimi.

<sup>23</sup> Ana suñarena, sitomena a naviawaena la apitom kome Ntewa Arimata, a Yesu Křisto

kieta Suḗ, la asuḗ amio ita, amio ḗna li nalelagaena la punu ga. <sup>24</sup> A lemamiēna kiena ne Ntewa naga sike e amiu, a e ḗna ga e ita punu ga naḗa tesuḗa tesitom manene laa kieta Suḗ Yesu Kristo, naḗa ḗisi na ita tesitom naga vaḗo vano-o, ve uro ḗe, ḗanene.

Inu, Pol.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8